



partii naleraq

UKA 2017/007-02

07-11-2017

2018-mut aningaasanut inatsisissatut siunnersuutip aappassaanneerqarnera.

2018-mut aningaasanut inatsisissatut siunnersuutip siullermeerneqarnerani Partii Naleraq sinnerlugu oqaaseqaativut innersuussutigalugit suliap aappassaanneerqarnerani Naalakkersuisut allannguutissatut siunnersuutaat Aningaasaqarnermut Akileraartarnermullu Ataatsimiititaliap isumaliutissiissutaa Partii Naleraq sinnerlugu imannak oqaaseqarfigissuarput:

Aningaasanut inatsisissatut siunnersuutip isumaqatiginniutigineqarnerata kingusikkaluartumik aallartinnera peqataaffigilluarparput, neriutigarpullu innuttaasunut pingaartumik pissakinnernut akunnattumillu aningaasarsiaqartunut pitsaasumik sunniuteqarluartumillu angusaqarfigilluarumaaripput.

Kangerlussuarmi ukiuunerani umimmanniartitsisarneq eqqarsaatigalugu, paasivarput umimmaat neqaanik tigooraavik aningaasaqarnikkut ajornartorsiuteqarneq pissutigalugu ingerlaqqissinnaanera apeqquserneqarsimasoq. Taamaattoqassappallu piniartut eqqornerlunneqarnissaat aammalu umimmaat neqaanik nunatsinni pilersuineq ajorseriaateqassasoq takorloorneqarsinnaavoq, taamaattumik Naalakkersuisunut kaammattuutingaarput, umimmaat neqaanik tunitsivimmi pissutsit iluarsineqarnissaat qulakkeerniarlugu aaqqiissuteqarnissamik suliniuteqartoqassasoq.

Kallerup innerata erngullu akiisa malunnaatilimmik 2018-imi januarip aallaqqaataaniit appartinneqarnissaanut suliniutit aallartinneqartut Partii Naleqqamiit tamakkiisumik taperserpavut. Taakku inuiaqatigiinnut 150 miliuuninik sipaarutaassapput.

Aamma assersuutigalugu, kommunini ilaqutariinnut sullissiviit meeqqanut ilaqutariinnullu atugarliortunut siunnerfilimmik tigussaasumillu suliniuteqarfigineqarnissaanut 13,3 mio kr-it kommunimut ataatsimoortumik tapiissutinut ilanngunneqartussanngormata iluaraarput.

Soorunami suliniutit aamma allat innuttaasunut ajunngitsumik sunniuteqartussat immikkut tamaasa taajunngikkaluarlugit tapersorsorpavut, pingaartumik aamma siusinaartumik sulisinnaajunnaarnersiutilinnut aaqqiissutissat ilanngullugit.

Taamaakkaluartoq suli neriuutingaarput utoqqarnut inuuniarnikkut malunnaatilimmik aaqqiissutissanik aningaasanut inatsisip pingajussaanneerneqannginnerani isumaqatigiissuteqarsinnaalluta.

Soorlu aningaasanut inatsisissat siunnersuutip siullermeerneqarnerani oqaatigingipput, timmisartunut suluusalinnut mittarfiliortiternernut taakkulu ilaasa tallineqarnissaanut, minnerunngitsumillu pilersaarutik allat aningaasarpassuarnik nalillit pillugit taakkununga aningaasalersuinissanut tunngasut suli maannamut ersarissumik takussuserneqanngimmata isumakulunnartoqartipparput.

Tassami pilersaarutit akisoorsuit milliardinik arlalinnik nalillit tamaasa ataatsikkut aningaasassaqartinneqanngitsut nalunngereerparput, taamaammallu suliassanik tulleriiaarinissaq pisariaqarluinnarpoq, innuttaasut aningaasaqarnikkut artorsinneqassanngippata.

Inussiarnersumik innersuussutigissuarput Upernaaq immikkoortoq 10-mi 2017-imut aningaasaqarnikkut ingerlatsineq pillugu nalunaarummut oqaaseqaatigut.

Erseqqissaqqillarput - mittarfiliornissat mittarfinnillu tallilerinissat tapersorsoratsigit aamma Kangerlussuup imarpik qulaallugu mittarfittut attatiinnarnissaa ilanngullugu.

Taamaammat angallannerup innuttaasunut naapertuuttumik pilersaarusiornarneqarnissaa aamma innuttaasut akiliisinnaassusiannut naapertuuttumik aaqqissuuteqqinnissaa pisariaqartoq isumaqarpugut, tassami kialluunniit soqutigisarissinnaangilaa kalaallit inuiaqatigiit aningaasaqarnikkut artorsillugit iliuseqarnissaq.

Soorlu assersuutigalugu pissusissamisoorinngilarput Kangerlussuarmi ukiup qaammataasa amerlanersaanni sikuusartumi talittarfissualiornissaq, tassunga taarsiullugu Sisimiuniit Kangerlussuarmut aqqusinniortoqarpat, tamanna inuiaqatigiit aningaasarsiornissaanut naapertuunnerussannginersoq eqqartorusunnarneruvoq.

Tassami ilaasunik kiffartuussinissamik isumaqatigiissut torrallataanneqisoq naggataatigullu akisoorujussuannortoq uteqqissanngikkutigu silatusaartariaqarpugut.

Taamaammat piumasaraarput Naalakkersuisut pilersaaruterpassuit akisuut aningaasalersorneqarnissaat pillugit pilersaarutiniq piaartumik saqqummiussaqaasat.

Tassami nunatta aningaasaqarnerata assingilluinnarpaa ilaqutariit aningaasaqarnerat, tassami ilaqutariit kikkulluunniit arlaannik akisuunik pisaassagunik nalilersuilluaqqaartariaqartarput, pisiassartik qanoq ilillugu akilersorsinnaanerlugu ?

Taamaangippammi ilaqutariit aningaasaqarnikkut ajutoorsinnaanerata nalaanneqaratarsinnaammat.

Kissaaterpassuaqarpugummi tamaasa ataatsikkut akilersinnaanngisatsinnik, taamaattumik tulleriarilluarneq pingaarnersiunerlu avaqqunn eqarsinnaanngillat.

Soorunami nalunngilarput inuussutissarsiutit siuarsarneqarnissaannut aningaasaliisariaqartarluta aningaasanik amerlanerusunik nunatta karsianut isaatitsinerussangutta.

Taamaammat nalilersueqatigiilluarnissarput pisariaqartitanillu tulleriarilluarnissaq pingaaruteqarlunilu pisariaqarpoq.

Aamma naggataatigut KNR-imi aallakaatitsisarnerit inatsisartullu ataatsimiittarfianiit aallakaatitsisarnerit eqqarsaatigalugit kalaallisut oqaatsitta pingaartinneqarnerunissaat, tassanilu kalaallisut oqaasillit amerlassusaannut naapertuunnerusumik kiffartuussinermi isumaqatigiisummi ikkoqqasoqarnissaa, minnerpaamik piunasaqaataasariaqartoq isumaqarpugut.

Taama anersaaruluuteqalaarluta isumaqatigiinniarnert naammassilluarneqarnissaannut qilanaarluta, maannamut naalakkersuisut allannguutissatut siunnersuutaannut Aningaasaqarnermut Akileeraartarnermullu Ataatsimiititaliap isumaliutissiisummini inassuteqaataanut akuersilluta taaseqataanissarput nalunaartingaarput.

Taama oqaasseqarluta siunnersuutip pingajussaanneernejanninnerani Aningaasaqarnermut Akileeraartarnermullu Ataatsimiititaliami suliareqqinneqarnissaa inassutingaarput.

Per Rosing Petersen